



Udruženje „Sindikat radnika u zdravstvu u Kantonu Sarajevo“
Obala Kulina bana 1, 71000 Sarajevo, Bosna i Hercegovina

Broj: 7/21
Sarajevo, 08.01.2021. godine

Ministarstvo zdravstva Kantona Sarajevo
n/r Ministra, prof. dr Haris Vranić

PREDMET: Dostava Informacije u vezi kolektivnih pregovora i generalnog štrajka broj: 6/21 od 08.01.2021. godine

Poštovani,

U vezi izjave Premijera Kantona Sarajevo Edina Forte date prilikom odgovora na zastupničko pitanje zastupnice Viteškić Smiljane na 32. Radnoj sjednici Skupštine Kantona Sarajevo, kao i u vezi izjava datih u medijima od strane pojedinih ministara iz aktuelnog saziva Vlade Kantona Sarajevo koje se odnose na ovaj Sindikat i kolektivne pregovore, a imajući u vidu da ste tek preuzeli dužnost ministra zdravstva Kantona Sarajevo, smatrali smo za potrebnim da Vas informišemo o toku kolektivnih pregovora još od 2016/2017 godine do danas, kao i razlozima stupanja i početku generalnog štrajka. Shodno tome, u prilogu ovog dopisa, u dobroj vjeri i radi upoznavanja sa činjenicama, dostavljamo Vam Informaciju u vezi kolektivnih pregovora i generalnog štrajka, broj i datum iz veze, uz napomenu da je sva pisana korespodencija u vezi predmetne informacije, kao i tonski snimci sastanaka, pohranjena u arhivi ovog Sindikata, a sve je dostavljeno i Ministarstvu zdravstva Kantona Sarajevo.

Uvažavajući Vaše obaveze po preuzimanju dužnosti Ministra zdravstva Kantona Sarajevo u vezi organizacije rada samog Ministarstva koje je mjesecima bilo bez ministra, te nagomilanih problema u zdravstvu Kantona Sarajevo, kao i aktivnosti na prioritetnoj borbi protiv koronavirusa, očekujemo da ćete u što skorije vrijeme organizovati sastanak sa predstavnicima ovog Sindikata na kome ćemo razmijeniti informacije i nastaviti već ranije započeti socijalni dijalog.


PREDSJEDNIK
Prof. dr Edo Selimić

Dostavljeno:

- Naslovu
- Članovima Glavnog odbora Sindikata radnika u zdravstvu u KS
- Ⓞ www.sindikatzdravstvaks.ba
- a/a



Udruženje „Sindikata radnika u zdravstvu u Kantonu Sarajevo“
Obala Kulina bana 1, 71000 Sarajevo, Bosna i Hercegovina

Broj: 6/21
Sarajevo, 08.01.2021.godine

PREDMET: Informacija u vezi kolektivnih pregovora i generalnog štrajka

Kolektivni pregovori 2016/2017:

Stupanjem na snagu novog Zakona o radu 2016. godine, Sindikat radnika u zdravstvu u KS je pokrenuo postupak kolektivnog pregovaranja i zaključivanja, po prvi put, Granskog kolektivnog ugovora o pravima i obavezama poslodavaca i radnika u oblasti zdravstva za područje KS (u daljem tekstu: Granski kolektivni ugovor). Nakon više podnesenih urgencija, pregovori su otpočeli 14.02.2017. godine i trajali su do 03.04.2017. godine, održano je 8 sastanaka, a pregovori su okončani bez potpisivanja Granskog kolektivnog ugovora iz razloga što se nije postigao dogovor o visini neto satnice u oblasti zdravstva za područje KS. Dakle, 2017. godine smo pregovarali sa Vladom KS koju su činili SDA i SBB, pregovore su vodili tadašnji premijer KS Konaković Elmedin i Zilha Ademaj, u svojstvu ministricice zdravstva KS. Zbog nepostizanja dogovora u vezi Granskog kolektivnog ugovora, ovaj Sindikat je organizovao generalni štrajk koji je trajao 22 dana, te je 03.11.2017. godine konačno usaglašen i potpisan Granski kolektivni ugovor kojim je jedva izborena neto satnica od 2,60 KM, uz obrazloženje predstavnika kantonalne vlade da Zavod zdravstvenog osiguranja KS nema sredstava za više. Ova satnica se primjenjuje na sve radnike zaposlene u zdravstvu u KS do dana današnjeg.

Pet dana nakon potpisivanja Granskog kolektivnog ugovora, tačnije 08.11.2017. godine, tadašnja Vlada KS predvođena Konaković Elmedinom je sa Sindikatom doktora medicine i stomatologije KS (u daljem tekstu: Sindikat doktora) potpisala Kolektivni ugovor o pravima i obavezama poslodavaca i radnika u djelatnosti doktora medicine i stomatologije na teritoriji KS (u daljem tekstu: Kolektivni ugovor za doktore), i to bez bilo kakvih prethodnih pregovora. Naime, 27.10.2017. godine Ministarstvo zdravstva KS aktom broj: 10-05-SI/17 obavještava Sindikat doktora, pozivajući se na vezu njihovog zahtjeva od 23.10.2017. godine, da je saglasno za zaključenje Kolektivnog ugovora za doktore, ali je potrebno da im dostave svoj prijedlog kolektivnog ugovora. Dakle, od izrade predmetnog akta do potpisivanja Kolektivnog ugovora za doktore prošlo je svega 12 dana, dok je ovaj Sindikat vodio pregovore skoro godinu dana. Kolektivni ugovor koji je potpisao Sindikat doktora sa premijerom Konakovićem je ustvari naš prepisani Granski kolektivni ugovor uz dodane, povećane koeficijente složenosti poslova doktorima za 0,40, odnosno doktorima specijalistima i subspecijalistima za 0,50 i još dodatno za 0,20 nakon 10 i više godina specijalističkog staža.

Kolektivni pregovori 2017/2018:

Zbog povećanja koeficijenata samo jednoj profesiji u djelatnosti zdravstva, Sindikat radnika u zdravstvu u KS je dana 09.11.2017. godine pokrenuo inicijativu za izmjene Granskog kolektivnog ugovora. Izmjena Granskog kolektivnog ugovora je potpisana nakog godinu dana pregovaranja, tj. 18.09.2018. godine, sa tadašnjim premijerom KS Zolj Ademom, a istim je svim radnicima u zdravstvu koeficijent složenosti povećan za 0,30. U isto vrijeme je i Sindikat doktora potpisao izmjene Kolektivnog ugovora za doktore na način da se doktorima medicine i stomatologije koeficijent povećava za 0,40. I ovaj put je potpisivanje izmjena Granskog kolektivnog ugovora uslijedilo nakon štrajka upozorenja, te generalnog štrajka oba Sindikata, i to Sindikata doktora 15 dana i Sindikata radnika u zdravstvu u KS nakon jednog dana.

Kolektivni pregovori 2018/2019/2020:

Vlada SDA - SBB

Aktivnosti u vezi početka novih kolektivnih pregovora su počele u septembru 2018. godine, tačnije 06.09.2018. godine, dakle prije nego što je istekao Granski kolektivni ugovor. Nakon imenovanja

tel/fax: 033 667 287, mob: 062 933 674

www.sindikatzdravstvaks.ba; e-mail: sindikatzdravstvaks@hotmail.com
ID:4202158440004; TRN: 134460100009367 ASA banka d.d. Sarajevo



Udruženje „Sindikata radnika u zdravstvu u Kantonu Sarajevo“
Obala Kulina bana 1, 71000 Sarajevo, Bosna i Hercegovina

pregovaračkih timova, prvi sastanak je održan u novembru 2018. godine, nakon čega se zastalo sa pregovorima zbog implementacije izbornih rezultata.

Vlada „šestorke“

Nakon imenovanja nove Vlade KS, koju je činila „šestorka“ i njenog pregovaračkog tima, pregovori za potpisivanje novog Granskog kolektivnog ugovora su počeli 01.02.2019. godine i isti su, nakon 6 sastanaka, okončani neuspješno 08.05.2019. godine. Na prvom sastanku, Pregovaračkom timu Vlade KS uručen je Prijedlog novog Granskog kolektivnog ugovora, o kojem se Pregovarački tim Vlade KS tokom pregovora nije očitovao, niti je dao svoj prijedlog visine neto satnice i koeficijenta složenosti poslova, kao ni bilo koji drugi konkretan prijedlog u vezi dostavljenog im Granskog kolektivnog ugovora. Naglašavamo da je u Granskom kolektivnom ugovoru, koji je dostavljen Pregovaračkom timu Vlade KS na 1. sastanku predložena neto satnica u visini 3,00 KM i koeficijenti složenosti poslova u rasponu od 1,90 do 5,60, dok je na 6. sastanku pregovaračkih timova održanom 08.05.2019. godine, Pregovarački tim Sindikata radnika u zdravstvu u KS dao prijedlog neto satnice 2,80 KM i visinu koeficijenta koji su sačinjeni prema koeficijentu 5,40 i omjeru doktor specijalista - medicinska sestra 1:2 i doktor specijalista - radnica na održavanju higijene 1:4, te je pregovaračkom timu Vlade Kantona Sarajevo u pisanoj formi dat prijedlog visine koeficijenta za sve grupe složenosti poslova uz molbu da sa istim upoznaju Vladu KS na prvoj sjednici Vlade poslije pomenutog sastanka i da dostave svoj odgovor koji, do pokretanja postupka mirenja po odredbama Zakona o radu, nismo zaprimili.

U periodu od 06. do 12. juna 2019. godine proveden je postupak mirenja po odredbama Zakona o radu, a koji nije uspio iz razloga nepostizanja dogovora strana spora u vezi predmeta spora. Naime, predstavnik Vlade KS je iznio stav Vlade KS, a to je da se ne mijenjaju trenutno važeći koeficijenti složenosti poslova i neto satnica, da se ostala prava radnika propisana Granskim kolektivnim ugovorom i Kolektivnim ugovorom za doktore objedine u pogledu povoljnijih prava, te da se kroz rebalans finansijskog plana Zavoda zdravstvenog osiguranja KS učini sve da se popravi sistem zdravstvene zaštite i kvaliteta zdravstvene usluge i da se u tom pravcu usmjere sredstva pomenutog Zavoda, dok predstavnik Sindikata radnika u zdravstvu u KS nije prihvatio prijedlog Vlade KS da se ne mijenjaju koeficijenti složenosti poslova i neto satnica jer bi prihvatanjem takve ponude priznali diskriminaciju počinjenu 2017. godine prema svim radnicima zaposlenim u zdravstvu u KS izuzev doktora kojima je tada koeficijent povećan, a što je predmet sudskog spora.

Nakon neuspjelog provođenja mirenja po Zakonu o radu, proveden je postupak mirenja i po Zakonu o štrajku, koji također nije uspio. Naime, Vlada Kantona Sarajevo je ponudila da se potpiše kolektivni ugovor na području KS koji je po pravima i obavezama isti kao i prava i obaveze iz ranijeg kolektivnog ugovora koji je važio od novembra 2017. godine do februara 2019. godine uz unošenje nove odredbe kojom se ugovorne strane obavezuju na pregovore o satnici i koeficijentima počev od 20. marta 2020. godine. Ovakvu ponudu Vlade KS ovaj Sindikat, iz gore navedenih razloga, nije prihvatio, tako da je organizovan generalni štrajk koji je započeo 02.09.2019. godine i koji je još uvijek u toku ali se ne provodi zbog pandemije uzrokovane koronavirusom, održana su i tri protesta ispred zgrade KS (oktobar i decembar 2019. godine, te juli 2020. godine), kao i štrajk upozorenja.

Od dana stupanja u generalni štrajk do razrješenja vlade „šestorke“, održano je sedam sastanaka Štrajkačkog odbora Sindikata radnika u zdravstvu u KS i tadašnjeg Pregovaračkog tima Vlade KS, ali dogovor nije postignut, tj. Granski kolektivni ugovor nije potpisan uz obrazloženje da nema novca, da neće biti novca u 2020. godini i da im trebaju historijski pokazatelji, da se pripremimo za dugoročan štrajk, a ista ta Vlada je sa Sindikatom doktora za samo 10-tak dana po dobijanju reprezentativnosti tog sindikata, i nakon svega dva održana sastanka (17. i 18. decembra 2019.), potpisala Kolektivni ugovor za doktore i po treći put povećala koeficijente složenosti poslova samo jednoj profesiji u djelatnosti zdravstva, doktorima, ovaj put za 0,30. Dakle, ukupno povećanje koeficijenta doktorima je za 1,10 odnosno doktorima specijalistima i subspecijalistima za 1,30 dok je svim ostalim radnicima u djelatnosti zdravstva koeficijent povećan samo za 0,30. Iako je u pregovorima sa predstavnicima ovog Sindikata vlada „šestorke“ cijelo vrijeme isticala da nema novca za usklađivanje koeficijenata kako je tražio ovaj Sindikat za sve radnike u zdravstvu, ponovnim



Udruženje „Sindikat radnika u zdravstvu u Kantonu Sarajevo“

Obala Kulina bana 1, 71000 Sarajevo, Bosna i Hercegovina

povećanjem koeficijenata jednoj profesiji u djelatnosti zdravstva pokazalo se da to nije tačno, tako da je 2019. godine po treći put povećan koeficijent doktorima, dok za sve ostale radnike u djelatnosti zdravstva usklađivanje koeficijenata nije izvršeno.

U toku pregovora sa vladom „šestorke“ Sindikat je s ciljem usklađivanja koeficijenata i na taj način ispravljanja nanesene nepravde iz 2017. godine, postizanja kompromisnog rješenja i okončanja generalnog štrajka, korigovao svoje zahtjeve za 75% odustajući od povećanja neto satnice, ostajući samo kod usklađivanja koeficijenata i to u umanjenim iznosima u odnosu na koeficijente tražene na početku i tokom kolektivnih pregovora (usklađivanje koeficijenata složenosti poslova se traži u omjeru doktor specijalista - medicinska sestra 1:2 i doktor specijalista - radnica na održavanju higijene 1:4, tj. doktor specijalista koeficijent 5,40; medicinska sestra koeficijent 2,70 i radnica na održavanju higijene 1,40). Međutim, predstavnici Vlade Kantona Sarajevo ni na to nisu pristali i ostali su kod svog prijedloga da se zadrži postojeće stanje. Na petom sastanku održanom 31.10.2019. godine predstavnici Vlade KS su predložili da se razgovara samo o usklađivanju koeficijenta jednoj grupi radnika u zdravstvu u KS, tj. medicinarima – „nedoktorima“, dok su na posljednjem sastanku održanom 09.12.2019. godine dali ponudu da usklade koeficijent za 0,10 medicinarima i magistrima farmacije (oko 42,00KM) uz smanjenje koeficijenta za 0,40 magistrima farmacije sa specijalizacijom (oko 168,00KM), što ovaj Sindikat nije prihvatio jer bi takvim postupanjem i sami počinili diskriminaciju prema radnicima u zdravstvu koji nisu zdravstveni radnici, te prekršili odredbe vlastitog Statuta.

Nakon formiranja nove skupštinske većine i pokretana aktivnosti u vezi izglasavanja nepovjerenja Vladi KS u decembru 2019. godine, Vlada „šestorke“ sa ovim Sindikatom nije ni vodila kolektivne pregovore, tako da od 09.12.2019. godine kada je održan posljednji sastanak sa vladom „šestorke“ pa sve do 05.03.2020. godine kada je održan prvi sastanak sa sada bivšim predstavnicima izvršne i zakonodavne vlasti KS kolektivni pregovori nisu ni vođeni.

Vlada SDA - SBB - DF

Što se tiče sada bivšeg saziva Vlade KS koju su činile SDA, SBB i DF na sastanku održanom 05.03.2020. godine sa tadašnjim resornim ministrom i predstavnicima tadašnje skupštine većine, dogovoreno je usklađivanje koeficijenata složenosti poslova kako je tražio ovaj Sindikat. Međutim, zbog izbijanja pandemije uzrokovane COVID-19 i proglašenja stanja prirodne i druge nesreće nije došlo do potpisivanja Granskog kolektivnog ugovora, zbog čega je tokom mjeseca aprila i maja 2020. godine, a na temu potpisivanja Granskog kolektivnog ugovora, održano više sastanaka sa predstavnicima tadašnje izvršne i zakonodavne vlasti KS. Nakon donošenja odluke o prestanku stanja prirodne i druge nesreće, a imajući u vidu novonastale okolnosti, dana 15.06.2020. godine ponovo započinju pregovori u vezi konačnog zaključenja Granskog kolektivnog ugovora. Do 01.07.2020. godine održano je ukupno pet sastanaka pregovaračkih timova na kojim su usaglašene sve odredbe Granskog kolektivnog ugovora osim tri pitanja, a to su da u nazivu kolektivnog ugovora stoji riječ: „Granski“, zatim visina koeficijenata složenosti poslova i datum početka primjene kolektivnog ugovora. Na 6. sastanku održanom 17.07.2020. godine pregovarački tim Vlade KS je iznio svoj, a ne vladin stav da ne postoji mogućnost da se usklade koeficijenti složenosti poslova kako je tražio ovaj Sindikat, a isto je ponovljeno i na naredna dva sastanka. Zbog iznesenog stava pregovaračkog tima Vlade KS na sastanku održanom 17.07.2020. godine do razrješenja vlade KS 05.01.2020. godine u više navrata smo pozivali Vladu KS da se izjasni kako o prijedlogu koji je ponudio Pregovarački tim Sindikata radnika u zdravstvu u KS, tako i o stavu koji je Pregovarački tim Vlade KS iznio na tri posljednja sastanka. Odgovor od Vlade KS koja je razrješena te dužnosti 05.01.2020. godine nismo dobili, tako da smo još uvijek bez Granskog kolektivnog ugovora.

Napominjeno da su, nakon ostavke dr. Mesihovića na funkciju ministra zdravstva KS, na sastanke umjesto članova pregovaračkog tima Vlade KS dolazili njihovi zamjenici koji nisu imali mandat pregovarati o gore tri neusaglašena pitanja, a bivši premijer Nenadić nije imao hrabrosti sa ovim Sindikatom potpisati kolektivni ugovor što zbog prijetnji štrajkom od strane Sindikata doktora KS, što zbog prijetnji koje su njemu i njegovoj porodici, kako nam je na jednom sastanku rekao, upućene putem sms poruka, te da će prema

tel/fax: 033 667 287, mob: 062 933 674

www.sindikatzdravstvak.ba; e-mail: sindikatzdravstvak@hotmail.com
ID:4202158440004; TRN: 1344601000009367 ASA banka d.d. Sarajevo



Udruženje „Sindikat radnika u zdravstvu u Kantonu Sarajevo“
Obala Kulina bana 1, 71000 Sarajevo, Bosna i Hercegovina

njegovim riječima ctt: „ukoliko se dogovori povećanje na ovoj osnovi sa Sindikatom radnika u zdravstvu, po automatizmu slijedi i obavezujuće povećanje za doktore medicine i stomatologije“.

Dostava presude Vrhovnog suda FBiH


U toku održavanja sastanka pregovaračkih timova 17.07.2020. godine zaprimili smo presudu Vrhovnog suda Federacije BiH broj: 09 0 U 034555 20 Uvp od 02.07.2020. godine kojom je presuda Kantonalnog suda u Sarajevu broj: 09 0 U 034555 19 od 06.12.2019. godine preinačena na način da se tužba uvažava, osporeno rješenje tuženog Ministarstva za rad, socijalnu politiku, raseljena lica i izbjeglice KS broj: 13-04/2-05-2558-13/19 od 02.07.2019. godine, a kojim je utvrđeno da je Sindikat doktora medicine i stomatologije KS reprezentativni sindikat za područje djelatnosti „zdravstvene zaštite“ (liječnička djelatnost i stomatološka djelatnost – doktori stomatologije i doktori stomatologije specijalisti) na području KS, se poništava i predmet vraća tuženom organu na ponovni postupak i rješavanje uz jasne upute za otklanjanje nedostataka na koje ukazuje presuda Vrhovnog suda Federacije BiH, broj i datum gornji. Postupajući po presudi Vrhovnog suda Federacije BiH, broj i datum gornji, Ministarstvo za rad, socijalnu politiku, raseljena lica i izbjeglice KS 26.10.2020. godine, skoro tri mjeseca nakon dostave predmetne presude, donosi rješenje kojim se „utvrđuje da Sindikat doktora medicine i stomatologije KS nije reprezentativan za područje djelatnosti zdravstvene zaštite na području KS“.

Podsjećamo i da je presudom Kantonalnog suda u Sarajevu broj: 09 0 U 028698 17 U od 11.02.2019. godine poništeno Rješenje Ministarstva za rad, socijalnu politiku, raseljena lica i izbjeglice KS broj: 13/04-05-1586/17 od 23.02.2017. godine, a kojim je utvrđeno da je Sindikat doktora medicine i stomatologije KS reprezentativni sindikat za područje (granu) djelatnosti doktora medicine i stomatologije na području KS.

Imajući u vidu navedeno, kao i općepoznate, zakonske posljedice poništenja rješenja, jasno je da su poništene i sve pravne posljedice koje je poništeno rješenje proizvelo, što u konačnici znači da su po sili zakona poništeni kolektivni ugovori i izmjene i dopune istog potpisani sa Sindikatom doktora, kako 2017. i 2018. godine, tako i 2019. godine.

U ovom trenutku, od četiri sindikata koji egzistiraju u KS: Sindikat radnika u zdravstvu u KS, Sindikat doktora medicine i stomatologije KS, Sindikat KCUS i Strukovni sindikat medicinskih sestara i tehničara KS, jedino je Sindikat radnika u zdravstvu u KS reprezentativan za područje djelatnosti zdravstvene zaštite na području KS, te jedini može sa Vladom KS pregovarati i potpisati kolektivni ugovor.

Iz svega gore navedenog, da se zaključiti da je 2017. godine, a posebno 2019. godine načinjena nepopravljiva posljedica jer su jako narušeni međuljudski odnosi u zdravstvu KS. Normalno bi bilo da smo pred vlašću svi jednaki, što do sada nije bila praksa jer su favorizovanjem jedne profesije u zdravstvu sve ostale profesije držane u diskriminirajućem položaj, a što je, donošenjem prvostepene presude kojom je utvrđena diskriminacija u jednom od predmeta koji se vode pred Općinskim sudom u Sarajevu, i potvrđeno. Radi se o postupku pokrenutom po tužbi Komore magistara farmacije Federacije BiH u kome je Općinski sud u Sarajevu dana 14.12.2020. godine donio presudu broj: 65 0 Rs 693900 18 Rs kojom se utvrđuje da su stupanjem na snagu Kolektivnog ugovora za doktore iz 2017. godine direktno diskriminirani po osnovu ličnog svojstva stečenog obrazovanjem, isključivanja, ograničavanja i davanja prednosti Sindikatu doktora i po osnovu nečlanstva u tom sindikatu, te indirektno po osnovu odredbe Kolektivnog ugovora za doktore, te pravilom, kriterijem i praksom istog kojim su potpisnici Kolektivnog ugovora za doktore stavili u nepovoljniji položaj radnike članove Sindikata radnika u zdravstvu u KS, odnosno članove pomenute Komore, magiste farmacije bolničkih apoteka, a čime je povrijeđeno njihovo pravo na jednako postupanje u oblasti radnih odnosa uz taksativno navođenje prava gdje je utvrđeno nejednako postupanje. Na kraju podsjećamo i da je pred istim sudom u toku postupak po tužbi ovog Sindikata za utvrđivanje diskriminacije nastale potpisivanjem Kolektivnog ugovora za doktore 2017. i 2019. godine.



tel/fax: 033 667 287, mob: 062 933 674

www.sindikatzdravstvaks.ba; e-mail: sindikatzdravstvaks@hotmail.com
ID:4202158440004; TRN: 134460100009367 ASA banka d.d. Sarajevo